

ЛҰИМА СЭРИПОС

14 мая
2020 года
№9
(1219)

Общественно-
политическая газета
Ханты-Мансийского
автономного
округа-Югры

www.khanty-yasang.ru

E-mail: gazeta@khanty-yasang.ru

Основана 11 февраля 1989 года

Победа хөтал 75 тәлэ төвлыс



С. Ромбандеева җарум хури

Ты хурит «Славяне» эргын махум пöслым öлэгыт. Победа хөталт
Ханты-Мансийск үс мир хумус мүйлысыт, ты урыл 2 лөпсыт ловиньтән.



Ты
номерт
ЛОВИНЬТӘН:

Үс мир
Победа
хөтал
янытласыт

2

Мувынкёс
павыл
хумыт
хөнтлысыт

4-5

Няхлаң
павыл
хум

6

Посалтыт
павыл
колтәгыл

9

Рүтанум
урыл
потыр
хансәгум

10-11

Сүкырья
павыл
хумыт
номавет

16

ПОБЕДА ХӨТАЛ КАСТЫЛ



Үс мир Победа хөтал янытласыт

Ты тәл Победа хөталт мүйлуңкве ат кос рөвыс, ос тамле ялпың хөтал – махманув нөх-патманыл пәсныл 75 тәл төвлыс, нас тох хумус мины. Москват Президентув Владимир Путин ветераныт ос Россия мир нупыл латың лавыс, Победа хөталыл янытласанэ. Тав лавме щирыл, хунь махманув пуссын пусмёгыт, тах ущ мүйлуңкве патэв – парад Победы вәрэв, эргунквейквуңкве патэв, «Бессмертный полкыт» ёмёв тах.



Округ кұшай Наталья Комарова Ханты-Мансийск үст әлпыл Победа паркыт Слава памятникын хорамың лұптат пиныс. Нә тох лавыс: «Мә янытыл өлнә мир тыхөтал пуссын мүйләгыт – мән махманув нөх-патманыл пәсныл 75 тәл төвлыс. Таимәгыс ты тәл Россиявт Памяти ос Славы Тәлыг намайавес.

Яңк нәтнә этпос 9 хөталэ Россия мир магыс мак ялпың хөтал. Ты кастыл мән сака кос щёпитахтасув, ветерананув ёт хөнтыглахтынувув, тананылн сав ёмас, сымың латың лавнувув, ань вос ваганыл, тананыл мән сака янытлыянув, эруптыянув. Ос пилыщмаң агм магыс тыхөтал мүйлуңкве ат вөрмёв. Ань сака ти ишхипың ут хосыт хөнтлум махманув нупыл янытлан латың лавёв, яныг хөнтыт патум махманув кәстыянув, та порат рүпитам, концлагерьт ос блокадный Ленинградывт савалам мир янытлыянув.

Ятил, тының ветерананув, 75 тәл ювле хультум порат нән мә янытыл өлнә мирыт фашистрищитыл вуян-

тасанын, та яныг хөнтыт нөх-патсын. Нәнан мән янытлыянув, нән элы-пәлынт мә мус хұтахлэв! Югра мāt өлнә мир, пуссын пустәгыл өлән, Победа хөталыл нәнан янытлыянув!»

Тувыл Наталья Владимировна үс кұшай хум Максим Ряшин ос волонтерывт ёт памятникын хорамың лұптат пинсыт.

Хөнтыт патум мә хум округ янытыл кәсың районт кәстүвёсыт. Ветераныт өлнә коланыл пөхан эргынйквнә махум ёхтала-сыт, эргысыт, сав ёмас латың, янытлан латың тананылн лавсыт, кәсыңанал мүйлупсал ос хорамың лұптатыл майвес.

Ханты-Мансийск үс янытыл «Славяне» ансамбль эргим яласас, «День Победы», «Катюша» ос «В землянке» эргыт эргысыт. Махум иснасныл кональ суссыт, тән ётаныл ос эргысыт, щәгтым кәтпатта рәтсыт.

Ялпың хөталт Ханты-Мансийск, Сургут, Нижневартовск ос Мегион үсыт тәра «Барсы» наппа товлыңхәпыт хөнтыт патум махум хурияныл ёт тыламласыт. Ты тәла «Бессмертный полк в небе Югры» намайавес. Сөтыра арыг хурит товлыңхәпыт онтсыл вәрвёсыт. Самолётный спорт кұшай хум Павел Манченко тох лавыс: «Нила үс нумипәлт

хөт товлыңхәпанув яласасыт. Хурит округт өлнә махум тән кётсыт – яныг хөнтыт патум рүтаныл, өпаныл, ащ-ойканыл хурит. Ты тәла таимәгыс вәрэв, ань өлнә махум вос ваганыл, мән, Россият өлнә мир, хөнтлум махманув номиянув, таимәгыс тән хурияныл ёлыл ос нумыл тотыглыянув. Тән тәланыл мән нәмхуньт ат ёрувлылув, элалы тотылув, тән хольтаныл мән ань мәтёв магыс тақыщ люлёв».

Ты тәл «Бессмертный полк» ишхипың ут хосыт вәрыглавес. «Югра» телерадиокомпаниян сав хөтпа рүтаныл хурит кётсыт, тән пуссын телевизор хосыт суссылтавёсыт.

«Окна Победы» тәла щёпитәлвес. Округ махум иснасныл хорамтасаныл – хөнтлам махманыл хурит тув вәрсыт, савсыр хорамыт якытласыт, кәтыл пөслысыт, янытлан ләтңытхассыт. Этйпәлаг 19 щёс порат исвещат пәламтәлсыт, хөнтлум мир кәстысыт.



Светлана
РОМБАНДЕЕВА

Хүл алышлан махум уральтавет

Ань мálтыпыг ёмтыс. Округвт
 Ёлнэ төва ят пáлыг-патсыт.
 Хүл алышлан пора ты ёхтыс. Ёсытт
 ос пáвлытт ёлнэ сossa мáхманув хүл
 пувуңкве патсыт.

Тан мágсыланыл рыб-
 инспекция мáхум хүлтнэ
 лáтың щёпитасыт. Ты
 тэлат урыл Югра мáт
 промышленность депар-
 таментыт рупитан нэ
 Светлана Кирилловна
 Гындышева потыртас.

Россия мáв янытыл
 сельхоз Министерстват
 рупитан хөтпат 2018 тál
 яңк нáтнэ этпосныл хүл
 алышлан положение-
 нэпак тáстысыт. Тот
 пуссын эрнэ тэлат хас-
 саныл. Ань хүл пувнэ
 хөтпатн өвлэт заявка-
 нэпак хансуңкве эри. Ты
 нэпак округ промышлен-
 ность департамент
depprom.admhmao.ru
 интернет лөпсыт хөн-
 туңкве рөви.

Тот нáнки өпарищ
 намын, общинан, хоты
 мáт ос мансáвит хүл
 алышлэгын, манарыл
 хүл пувегын, адресын
 ос телефонын пуссын
 хансэн. Ювле хультум
 тáлт мансáвит хүл пу-

выгласын, ты вáрмалы
 урыл ос хансэн.

Нáн ётын мансáвит
 хөтпа хүл алышлы, ты-
 гыл манах сossa хөтпа
 олы, тан наманыл ос
 хансуңкве эри. Ты хөтпат
 хоты мáт өлэгыт, кáсың
 элумхóлас тув хүлтэн.
 Заявка-нэпак щёпитан
 юи-пáлт, община кұщай
 такви тот вос хасхаты.

Ты нэпак ищхйпың
 ут хосыт печатайтаңкве
 ос нас хаснэйивыл ём-
 щакв хансуңкве рөви.
 Тувыл нáнки өщнэ эрнэ
 нэпаканын ос адресың
 лұтың тагыл пöслэн.

Ты акван-атнэ нэпа-
 канын пуссын Ханты-
 Мансийск үсн, Студен-
 ческий үсхулы, 2 колн
 кётэлбн. Матыр ат ке
 торгамтэгын, **+7 (3467)**
353-404 телефон хосыт
 тув свонитэн. Тот ём-
 щакв хултавэн. Ты кол
 кáсың хөтал пáлыг-óлы,
 туп ўцлахтын хөталыгт
 ат рупиты.



Кáсашегын ке, ты нэ-
 паканын почта манос
 ты электронный адрес
depprom@admhmao.ru
 хосыт ос кетуңкве вёр-
 мянын.

Ань лұпта этпос
 оигпан мус рыбинспек-
 торыт округвт ёлнэ ят
 этэ-хөталэ уральтым
 яласаңкве патэгыт. Ёрга-
 лахтым ёлэн, хүл мори
 ул алышлэн. Ты хөталыт
 сýс ят хулупъяңкве ат
 рөви. Мáхум туп я вáтат
 няслуңкве тáртавет тах.

Няслым акв хөтал
 сýс акв хөтпан кáсэв,
 сорт, сыг ос судак лов
 кила, сымри, щапак,

түрхул ос елец вáт кила
 пувуңкве рөви. Пуссын
 аквёт ловиньятаңкве
 ке, акв элумхóлас хөтал
 сýс вáт кила сáвсыр
 хүл пувуңкве тáртаве.
 Ты хуланын нáнкинáн
 мáгыс алышлэн, эл ул
 тыналэн, атиңк, штра-
 фыл пинавэн тах.

Светлана Кирилловна
 лáвме ширыл, ань об-
 щинатын эрнэ нэпак
 хаснэтáл хулуп ўнттуңкв,
 нáтылтаңкв, мори хуль-
 туптаңкве ос мөт хөтпан
 уральтан мáгыс миңкве
 ос ат рөви. Нэпактáл хүл
 алышлан хөтпа 2-5 сò-
 тыра солкóви сáвитыл
 штрафыл пинуңкве па-
 таве тах. Ты коныпал
 браконьер-хөтпа госу-
 дарстван оln ойтуңкве
 лáваве. Тувыл ты лüль
 вáрнэ мáгыс тав мотор-
 хáпе сýт хосыт хот-виң-
 кве вёрмаве.

Ос хотьют эрнэ нэ-
 пактáл шар сáв хүл алым
 пуваве ке, тав уголовный
 тэла щырыл сутын миве.
 Тыимáгыс турманколн
 ўнттуңкве вёрмаве. Та
 яныт ёмас вáрэн, эрнэ
 нэпактáл сáв хүл ул
 пувэн, туп няслуңкве
 вёрмегын.

Ульяна ДАНИЛО
 хансум потре мáньщи
 лáтңыг Николай
 МЕРОВ толмáщлэстэ



ПОБЕДА ХӖТАЛ КАСТЫЛ



Мувынкёс павыл хумыт хӖнтлысыт

Ты тӕл ӕнк нӕтнэ этпос 9 хӖталӕт яныг хӖнт пора оигпам пӕсныл 75 тӕлэ ань ты тӕвлыс. Тӕнт 1941 тӕлт сӕв пӕвлытныл мӕныщи хӖтпанув ты пылыщманӕ вӕрмалын тотвӕсыт.

Мӕн №8 газетавт хӖнтлам мӕныщи хумиянув урыл хансуӕке ӕвылтахтасӕв. Ты тӕлав ӕлалы тотуӕке патылӕв. Ань ос Хӕльӕс район Мувынкёс павыл хумыт урыл потыр ловиньтӕн.

Василий Никитич Меров

Хӕльӕс район Мувынкёс павылт 1911 тӕлт самын патыс. Тав омагетӕ Никита ос Елена Меровыг ӕлсӕг. Рудольф пыгӕн мӕн ӕгитӕ Галина Рудольфовна Кондина (Мерова) потре щирыл, ӕпатӕ кит увщи, акв каӕк ӕныщис: Екатерина, Прасковья ос Дмитрий.

Василий Никитич ӕкватӕ наме Мария Николаевна Гоголева ӕлыс. Таве Хӕльӕс район Кӕртӕя пӕвлытныл нӕг тотыстӕ ос тӕн Хӕслӕх пӕвлыт ӕлсӕг. Ӕкватӕ ӕйкаг аквӕт сӕт нӕврам янмалтасӕг: Сергей, Владимир, Дмитрий

(тав мӕн порат ӕтимыг ӕмтыс), Рудольф, Анатолий, Василий ос Ольга.


Василий Никитич 1941 тӕлт хӖнтлын мӕн тотвес. Тав Ленинградский фронтыт хӖнтлыс, писалил ӕмщакв пӕтлуптаме мӕгыс снайперыг ӕлыс. Акв порат хӖнтлыматӕ кӕтлуваге сас нӕлын сакватавесӕг. Хум 1943 тӕлт пӕльницат моц пусмалтавес ос юв кӕтвес.

Ӗвыл тӕлытт юн ӕлме порат кӕтлуваге акваг лоӕхитавесӕг. Ӕкватӕ Мария Николаевна таве юн пусмалтастӕ. 1955 тӕл мус кӕтаге марляӕ тӕрыл пӕрыгтым ӕщсаге. Тувыл хунь кӕтаге ӕмщакв тӕкмысӕг, тав мӕнхӕпыт, ӕсат ос мӕт пормасыт мӕщтырлаӕке патыс.

Хум Хӕслӕх пӕвлыт матахмат тӕл колхоз кӕщаиг рӕпитас. Тувыл вӕраим яласас. Ӕтылнув пенсиян патме мус нӕй харыгтан хӖтпаг акваг рӕпитас. Тав хӖнтлуме мӕгыс мӕгылн тагатам сӕв пӕсыл майлувес. Колхозт ӕмщакв рӕпитаме мӕгыс ӕс янытлавес. Василий Никитич 1983 тӕлт лӕпта ӕтпос хӖтыт хӖталӕт ӕтимыг ӕмтыс, Хӕслӕх пӕвлыт ӕл-щӕпитавес.

Василий Андреевич Ромбандеев

Хӕльӕс район Мувынкёс павылт 1912 тӕлт



Иван Петрович Ромбандеев

Хӕльӕс район Мувынкёс павылт 1917 тӕлт самын патыс. Ӕкватӕ наме Акулина Викторовна Анямова ӕлыс, тӕн хӕрум нӕврам ӕщсӕг: Зоя, Василий ос Елена.

Хум Хӕльӕс военкоматыл хӖнтлын мӕн тотвес. Иван Петрович 1942 тӕлт вӕт сӕграпнал ӕтпос онтоловит хӖталӕт порславес. Тав Ленинградский область мӕт ӕл-щӕпитавес. Нӕматыр потыр вӕссыг тав урӕтыл ӕтим.

Василий Ефимович Ромбандеев

Хӕльӕс район Мувынкёс павылт 1895 тӕлт самын патыс. Ӕкватӕ Агафья Алексеевна Ромбандеева ӕлыс. Тӕн колтагӕнт ат нӕврам яныгмасыг: Мария, Дарья, Ольга, Владимир, Алексей.

Василий Ефимович 1942 тӕлт ӕйттур ӕтпос атхуйпловит хӖталӕт Ханты-Мансийск ӕс военкоматыл хӖнтлын мӕн тотвес. 1944 тӕл ӕйттур ӕтпост хум хотты мӕт ванӕтӕл та хулытыс. Ань ты хӖтал мус тав урӕтыл нӕматыр ат вӕве.

Илья Петрович Ромбандеев

Хӕльӕс район Мувынкёс павылт 1897 тӕлт самын патыс. Тав Хӕрыӕпӕвыл Волкова нӕ ӕт ӕлыс, наме ат вӕве. Ты щӕмья кит пыг ос кит ӕги янмалтасӕг: Иван, Артӕм, Пелагея ос Ульяна.

Илья Петрович Хӕльӕс военкоматыл хӖнтлуӕке тотвес. Хум 1942 тӕлт мӕнполь ӕтпос хӖтхуйплов хӖталӕт хӖнтлын мӕт порславес.



ПОБЕДА ХОТАЛ КАСТЫЛ



В.Н. Меров ос Экватэ Мария Николаевна
Хослох колэнт послым блэг

Тав Ленинградский областьт ёл-щёпитавес. Мот потыр тав урётыл атим.

Константин Андреевич Ромбандеев

Хальёс район Мувын-кёс павылт 1918 талт самын патыс. Тав атятэ наме Андрей Петрович Ромбандеев олыс. Константин Андреевич 1941 талт ойттур этпост Ханты-Мансийск ўс военкоматыл хонтлуңкве тотвес. Хум 1941 талт ват саграпнал этпост хотты мат ванэтал та хультыс. Ань ты хотал мус тав урётыл нэматыр потыр атим.

Леонид Александрович Ромбандеев

Хальёс район Мувын-кёс павылт 1906 талт самын патыс. Тав щаняге-ащаге Елена Павловна ос Александр Ромбандеев олсыг. Хум экватэ наме Елена Фотеевна Мерова олыс.

Леонид Александрович Хальёс военкоматыл хонтлуңкве тотвес. Тав 1943 талт маньполь этпос сатыт хоталэт порславес. Война порат

Ленинградский область Подолжино павылт ёл-щёпитавес. Тувыл ётылнув та савынкant ёл-щёпитым салтатыт Новгородский область Старорусский район Залучье павылн тотвёсыт, тот ёл-щёпитавёсыт. Мот потыр тав урётыл атим.

Михаил Петрович Ромбандеев

Хальёс район Мувын-кёс павылныл олыс. Тав самын патум ос атимыг ёмтум хоталанэ ат вавет. Атятэ наме Петр Яковлевич Ромбандеев олыс. Хонтлын нак ёмтум элы-палт тав Хорыңпавылт олум Анна Михайловна Хозумова нэг тотыстэ. Ты щёмыят нила няврам яныгмас: Домна, Акси́нья, Лазарь ос Варвара.

Михаил Петрович Хальёс военкоматыл хонтлуңкве тотвес. Ман мав пилтал вуянтыматэ хотты мат порславес, ванэтал та хультыс.

Павел Ефимович Ромбандеев

Хальёс район Мувын-кёс павылт 1905 талт

самын патыс. Война элы-палт Дарья Осиповна Сайнахова нэг тотыстэ. Тэн сат няврам ошсыг: Прасковья, Роман, Татьяна, Матвей, Матрёна, Осип ос Георгий.

Павел Ефимович 1941 талт мань таквс этпост Ханты-Мансийск ўс военкоматыл хонтлуңкве тотвес. Та пасныл юв пицма ат кётыглас. Хум 1941 талт ват саграпнал этпост хотты мат порславес, тав ос ванэтал та хультыс. Тав урётыл воссыг нэматыр потыр атим.

Семен Александрович Ромбандеев

Хальёс район Мувын-кёс павылт 1916 талт самын патыс. Тав омаге-а́тяге Елена Павловна ос Александр Ромбандеевыг олсыг. Семен Александрович экватэ Анна Кузьмовна Гындыбина олыс.

Семен Александрович Хальёс военкоматыл хонтлын ман тотвес. Хум 1944 талт тал котиль этпос хотхуйплов хоталэт хонтлым порславес. Тав Ленинградский областьт ёл-щёпитавес.

Семен Петрович Ромбандеев

Хальёс район Мувын-кёс павылт 1910 талт самын патыс. Тав атятэ Петр Яковлевич Ромбандеев олыс. Экватэ Хаңла павыл нэ Ромбандеева Д.П. олыс.

Семен Петрович 1941 талт яныг таквс этпост Хальёс военкоматыл хонтлуңкве тотвес. Хум 1942 талт тал котиль этпост хотты мат порславес, ванэтал та хультыс. Воссыг тав урётыл нэматыр потыр атим.

Хаңла павыл хонтлам хотпат

Хальёс район Хаңла павылныл маньщи хотпат ос хонтлысыт. Ты павылт пёс порат савыңпалэ Качановыт олсыт. Ань тованыл урыл элалы ловиньтэн.

Дмитрий Петрович Качанов

Хальёс район Хаңла павылт 1900 талт самын патыс. Тав экватэ наме Т.И. Качанова. Дмитрий Петрович Хальёс военкоматыл хонтлуңкве тотвес. Тав 85 стрелковый дивизият хонтлыс. Хум 1942 талт сұкыр этпос китыт хоталэт порславес. Дмитрий Петрович Ленинградский область Колпино ўст ёл-щёпитавес.

Илья Николаевич Качанов

Хальёс район Хаңла павылт 1921 талт самын патыс. Тав а́тяге-омаге Николай Тимофеевич ос Евдокия Осиповна Качановыг олсыг.

Илья Николаевич Хальёс военкоматыл хонтлуңкве тотвес.

Тав 136 ОСБр мат лусытым яласас. Качанов И.Н. 1942 талт ват саграпнал этпост аквхуйпловит хоталэт порславес. Тав Калининский область Ржевский район Соустево павылт ёл-щёпитавес.

Мот хонтлам маньщи хумыт урыл мот газетатт ам элалы ос тах хансэгум.

Ты потыр «Птицы светлой памяти» нэпакныл Николай НИКИТИН хансыс

ПОБЕДА ХӨТАЛ КАСТЫЛ

Няхлаң павыл хум


Атям Константин Семёнович Вынгилев Хальүс район Няхлаң павылт самын патыс, тал котиль этпос 25 хөталэт 1932 талт. Опагум-щашёквэгум сáлыт ошсыг. 1938 талт сáлыянэн хот-вуйвёсыт, колхозн майвёсыт, атхуйплов сáлыл туп хультуптавёсыт.

1939 талт опам хот-таль щалтыс, щашёквэм хұрум нывраманэ эт хультыс. Атям оматэн акваг нётыс, найив сáгыс, вит алумтас. Тув палыт няслыс, юв кáсың хөтал вётра сáвит хул тотыс. 1941 талт Наталя ййгрище áтимыг ёмтыс, краснуха áгмыл хартыс.

Атям хунь школан миннэ поратэ ёхтыс, оматэн ат тартаве, Соня ййгрище нянькалаңкве ёрыс. Ос тав сытамыл школан хайтталас, наме тув хасвес, школьный формал майвес. Лáви, такви пёс кáще кол пöхат хот-туйтыгпастэ. 1942-1944 талытт Няхлаң павылт ханищтахтас, элалы Кульпаст ханищтахтас. 1945 талт школан юв ояс, мольщаныл олыс, лáглыл ёмыс. Оматэ эт колхозт рүпитас, лувыл пум хартыс, щёр хылыс. Кульпасн таквсы улс минас.

1949 талт сáт класс áстлас, элалы торгово-кооперативный школат ханищтахтас. 1951 тал мус Кимкъясуй павылт лапка кұщаиг рүпитас. Тувыл Тальский геологический экспедициян патхатыглас. 1954 талт Салехард үст зооветеринарный техникумт ханищтахтункве патыс. Ётыл сáлыт пусмалтым Надымский районт рүпитас.

1960 талныл 1964 тал мус Хальүс район Саранпавылт олум



ветеринарный пунктты сáлы лёккарыг олыс. Нила оленеводческий пиркáтат – Няхлаң, Кульпас, Лопмус ос Сортыңъя сáлыт пусмалтас.

1964 талт колтáглэ эт Хальүсн вáнтлыс. Тот ос сáвсыр мáт рүпитас – Ванзетурский совхозт мисыт ос лүвыт пусмалтас, отдел кадров кол кұщаиг олыс, Хальүс авиаотрядыт нáй харыгтас.

«Победитель социального соревнования» намыл майлуwes. Магылн тагáтан пöсыт онышис: «За доблестный труд в годы Великой Отечественной войны», «Ветеран труда», «50 лет в Великой Отечественной войне». 2012 талт Хальүст áтимыг ёмтыс.

Л.К. ВЫНГИЛЕВА
С. РОМБАНДЕЕВАН
толмашлавес



Ащум

Мáнь сáвитыг оlnэ мир тáнки халанылт ёмщакв вáйхатёгыт, тувыл тáнки халанылт рүтыг оlnэгыт. Ам ань нáнан амки áщум урыл потыртёгум. Мáн тав нупылэ акваг «áщ» лáвсуw. Колпöх оlnэ мöт ныврамыт тáнки áщаныл нупыл ос «áтя» лáвсыт.

Ам áщум наме Калистрат Прокопьевич Партанов, мáньщи хум. Тав Октябрьский район Ялпүс павылт яныгпöль этпос вáт нупыл ат щислат 1926 талт самын патыс.

Опам, Прокопий Никифорович Партанов, хул алышлан ос вöраян хотпаг олыс, 1887 талт самын патыс. Щашёквэм Анна Ефремовна ос мáньщи нэ. Тэн ат ныврам янмалтасыг.

Опам сáв рүпитае магыс «Орден Трудового Красного знамени» магылт ошнэ пöсыл майвес.

Ты урыл ам 2016 талт государственный архивколт пёс нэпáкт тáрапаттыслум. Тот опарищ наме мöщ мöт щирыл хансыма, Партанов Прокопий Никитич, ос мáн вáглув, тьи тав ты. Тöнт хөнтлан вáрмáль моляхнуw вос оигпас, тав мöт хум хөтпат эт



ПОБЕДА ХӨТАЛ КАСТЫЛ

ХӨНТЛУҢКВЕ ТОТЫГЛАВЕС



Т.Н. Партанов



Н.К. Партанов

сав воряяс, хұл алыщлас. Юи-овыл олум таланэт тав сампыль-талыг ёмтыс.

1941 талт хонтлан вәрмалъ ёмтум порат, сасса хум хотпанув пуссын войнан та тотыгпавёсыт. Ас ос Иртыш я ватагт үнлүм павлыт татлаг тара та хультсыт. Ос 1943 талт 1926 тал порат самын патум пыгыт войнан кетуңкве патвёсыт.

Министерство обороны пёс нэпакыт тох хансым олыс, ащув хұрум класс асталас, колхоз мағыс хұл алыщлас, член ВЛКСМ. П. Н. Партанов ат ныврам оныщи, ос салтат хольт яныг ұсылыл ёмыгтаңкве 110щёсханищтавес.

Тонт хум хотпат Ханты-Мансийск окрвоенкомат палыл войнан вуйвёсыт, тувыл найңхапыл я хосыт Омск үсн тотвёсыт. Та үст тән өвлэт ханищтавёсыт ос ётыл ущ поездын талтувёсыт ос хонтлуңкве та тотвёсыт.

Лүпта этпос 21 хоталт 1944 талт ащум пылышман мән та кетвес. Тот 98 элүмхолас поездын үнттувёсыт ос Ершов лейтенант-

хум ёт элалъ та минмыгтасыт. Тав II Украинский фронтын ликмыс. Тамле фронт 1943 талт мәнъ таквс этпос 20 хоталт атвес.

Тув ёхтуме порат II Украинский фронт Венгрият Будапешт үст хонтлыс, тав «Максим» намба пулемётыл майвес. Ты пулемёт 64,3 кила, тыгле-тувле тотыглаңкве сака тәрвит олыс, таимағыс кит хотпан алумтавес.

Өвлэт пәтлуптан хумн тав нас нётыс, пулемёт вовта кёре иссыглахтын порат пөльтнэ мағыс витыл сөсантастэ. Ос патроныт ляпан майлас, тән нэмхотталь ул вос тагапасыт, акваг уральтым ошсанэ. Ётыл такви пәтлуптаңкве патыс. Та щирыл ащум 1944 тал мәнъполь этпосныл 1945 тал рётың юсвой этпос мус Венгрия ма вуянтан мағыс хонтлас.

Тот хонтламе урёт сака сав атыпыл потырталыс. Туп лавсас, та хаштәл мат тэлыяныл малтыпыт, торың ёмас лёңх атим, акваг раkv хосыт ёмсыт ос маснутаныл торың ат тослысаныл. Окопаг

хилым вонхат тот та ушлахтасыт. 1945 тал яңк нәтнэ этпост II Украинский фронт салтатыт Чехословакият хонтлысыт. Ос лов щислат тән Писек ос Ческо-Будесвище ұсыгт американский салтатыт ёт акван-хонтхатасыт.

II Украинский фронт лүпта этпост ләккватаратавес. Ащум 1947 талт лусытан мәныл пойтыс ос юв кетвес. Тав «За взятие Берлина» пөсыл майвес. Тувыл кентәт военный звездочка акваг оныщистэ. Това салтатыт юв миннэныл порат ты звездочканыл тулмантавёсыт, таимағыс ёл-хуйнэныл порат пұтыска ёлы-пәлн ёмшакв хот-түйтыгласаныл. Войнан ялум хотпат ты выгыр звездочка сака янытласаныл. Рүтанув пуссын щәгтым олыс, ащув пұстағыл юв ёхтыс.

Касың сатыт талт Ялпұс павлың махум пұрлахтуңкве ялсыт ос тув мот мүй хотпат ёт акван-атхатыгласыт. Та сав махум халт ащув щәнюв ёт акван-хонтхатасыг. Щәнюв наме Анна Петровна Тынзянова олыс. Тән

акван та минасыг. Аквёт нёлолов ныврам ошсыг, ань мән туп Рая йигрищмёнтыл хультсумён.

Мән яныгмамув порат 9 май Победа ялпың хотал сака ат янытлалыслув. Ащув такви война урыл мәнавн атыпыл потырталыс. Хонтлам хотпат аквтох мот махмыт ёт рүпитасыт, хұл алыщласыт, ворясыт ос нывраманыл янмалтасыт.

Рүпататэ мағыс тав мағыл тагатан сав пөсыт оныщис ос «Ветеран труда» пөсыл мүйлуптавес. Тав 1976 талт яныгпөль этпос нёлолов хоталт атимыг ёмтыс, Хальуст ёл-щёпитавес.

Мән таве посың номтыл кастылув. Тав урёт ам Тимур пыгумн акваг потыртэгум. Пыгум 2019 тал оигпам элы-пәлт лусытаңкве тотвес. Тав Свердловский областът связистыг лусыты. Тав ань ос салтат, лусытан этпосанэ ёмшакв вос минэгыт, таксарыг вос ёмты, пұстағыл вос олы.

Никита ПАРТАНОВ
потре мәнъщи ләтңыг
Тамара МЕРОВАН
толмашлавес

Ушма павыл колыт ёмашакв щёпитавёсыт

Свердловский область
Ивдельский районт өлнэ
мәньциянүв тәрвитың вәрмалъ
ос өньщёит. Аквмат порат
Кёрасколыңъя павыл улян тэвес,
мәньщит пуссын Ушма павылн
вәнтласыт, тот колытыл үнттүвёсыт,
тувыл пуссын тув та өлмыйтасыт.

Матах тал мән та
колытта өлсүв, ётыл ос
колыт илтый саюңкв
патсыт, мән Ивдель
үс мирколн пицма
хассув. Ос мөлты тал
коланув уцта ёмашакв
щёпитавёсыт. Сартын
рущитна үнттым колыт
лөльсаң вәрыйлавёсыт.

Сака ащирмаң порат
колыт тара вөтыйлавё-
сыт. Матыр витпүт кол-
канн ке үнттэв, алпыл
мус яңкыл поляве. Ис-
насыт ос авит халыңыт,
ащирмаң вөт юв щалты.
Норыт халт өлнэ хаслы
– хот-патыйлас. Колкан
норыт хот-сайсыт. Күрыт
юв посымлэит. Түйтнэ
ос раковнэ порат, раков
вит юв щурьи.

Тувл та коньпал ос
колыт павыл янытыл
ләкква-үнтталавёсыт.


Хотьют сыппуңкыт,
хотьют я ватат, хотьют
сыппуңк ёлы-пәлт, та-
щир ос лөль. Я ватат
үнлын колыт түйг, хунъ
вит нөх-өнты, алты
витна ёхтавет. Сып-
пуңк ёлы-пәлт үнлын
колыт ос сыппуңкныл
витна овтавет, тамайс
кол норанэ хот-сайёит.
Тащир та хотум өлсүв.

Мөлты тал ос лильпи
кол үнттын рущит ёх-
таласыт, тән тай мощ
ёмашаквнүв вәрсыт.
Сартын сав мәнь ахвтас
тотсыт, партыт, кёр пәр-
тыт, стекловата, тувл та
коныпал ос осэвәтәл
пормас.

Колыт аквта хөталыт
торый вәруңкв та түйт-
хатсыт, сартын акв кол
хот-лөсталасаныл, ётыл
тащир аквал-аквал пус-



Ушма павыл няврамыт



Хот-щёпитым колыт

сын ләшлакв та вәруң-
кве патсаныл.

Та порат ам тот өлсум,
суссус, хумыс вәрёит.
Хунъ тән колкан хот-
висаныл, ам кәсаласлум,
мар колкан ёлы-пәлт
өлыс: сака мощ лөмт-
рищ стекловата, тувл та.

Партыт пуссын сай-
мыт, ошщат, лөлит, кол-
кан ёлы-пәлт яный вит
вөңха. Тувл колкан үрнэ
норыт ос акв тамлет,
саймыт. Элалъ ос тән
саюм партыт кон-пәх-
тысаныл, тувл лильпи
партыт нортсыт, тащир
та хотум ләшчал мәщ-
тырлахтасыт.

Ётыл ос хунъ колкан
әстыс, тән кол норыт
стекловатал тохруңкве
патсыт. Мәньщит тәнки
колыт реиный вәруңкве
ос нётсыт. Касың щемья

янас такви колэ вәруң-
кве нётыс. Кол норыт
стекловатал тохрувёсыт,
тувыл хаслыл, нумыл
ос эльмың утыл, ётыл
уцта кёр партыл.

Күрыт мощ ос ёма-
шакв вәрвёсыт, асың
мәт лап-сартвёсыт, төв
мәт лильпи кирпачыл
вәрвёсыт. Иснасит ос
авит пенал пенитавёсыт,
колыт коньпәланыл
лильпи фундаментыл
вәрвёсыт. Тувыл та,
тащир пуссын колыт та
вәрвёсыт.

Ань Ушмаң колыт
мощнүв реиный патсыт.
Ты тал мәньщит тәлы
ат пөльвёсыт, ёмашакв
өлсыт, тувл пөлям пора
урыл аты номсасыт.

**Евгений
АНЯМОВ**



Интернатт пөслым ағит

ПОБЕДА ХОТАЛ КАСТЫЛ



Тав Сўкыръят Олыс



Хуриг ёмаспал нупыл китыт
агириц - ты Наталя агитэн

Павел Фомич Сайнахов 1916 талт Сўкыръя павылт самын патыс. Оматэ Мария Ларионовна,

әтятэ Фома Сайнахов. Война элы-палт Павел Фомич нэ тотыс, наме Агафья Дмитриевна Сайнахова. Хўрум нйврам ошсыг – Сергей, Евдокия ос Наталя.

1941 талт ойттур этпост хум Хальўс райвоенкомат палыл яныг хонтын вуйвес. Ленинградский фронтыт хонтлыс, блокадный Ленинград вуянтас.

Павел Фомич 1942 талт яныг таквс этпос 29 хоталэт порслувес. Ленинградский область Залуциновский районт ёл-щепитавес.



Петр Фомич экватэ ос нйвраме


Посалтыт павыл колтагыл

Тимофей Константинович Остеров Хальўс район Посалтыт павылт 1895 талт самын патыс. Воряян, хўл алышлан хумыг олыс, пиркәтирыг рўпитас. Сав рўпитама магыс акваг янытлавес, магылн тагатан пōсытыл майлувес.

1943 талт Тимофей Константинович Петр пыге ёт яныг хонтын вуйвесыг. Посалтыт павылныл Кульпас мус мәнхәпыл миначыг, элаль катерын ўнттувесыг, хонтлуқке та тотвесыг.

Ойка экватәнтыл ат нйврам ошсыг - пыгән Петр, тувыл нила аги Дина, Агафья, Нина ос Ульяна. Мәнә агитэ номитэ, хунь атяныл войнан тотвес, тав ёл-хуоңкве щепитахты, әще суп ляпан пинитэ, уш та оилматаве. Дина агитэ тох потыртас: «Колув пōхат яныг ўльпа лўлис, тот атяв акваг пәкв паттыс. Хунь яныгмам павлунм ялантәгум, та ўльпав кинсылум. Павлув хосат оссувлавес, колыт пуссын нōх-ёсвёсыт, павылгёр янытәт нирн яныгмавес».


Тимофей Константинович Ленинградский фронтыт хонтлыс, тувыл Эстония нупыл кетвес, тот хот тыпыс.



Т.К. Остеров

Пыге Петр Тимофеевич Остеров 1922 талт Посалтыт павылт самын патыс. Яныг хонтын Ханты-Мансийский райвоенкомат палыл тотвес. Овлэт Омск ўсн хаништахтуңкве тотыглавес, тувыл элаль кетвес. Танкистыг олыс. Петр Тимофеевич потырталыс: «Мўңи ма ёлы-палн пинумтылув, аква та щёс паялты, бомбат палыг толматан ма тамле исум та олыс. Тот акваг патинкатыл олсув, лагланув пёрмылыл пёрсалыянув. Та лагылмаснут сака сурум, лагланув хот-сартлыянув, тувыл та лоңхитавет».

Яныг хонт оигпас, тав юв ёхталас, пуңк агмыл савалас,



П.Т. Остеров

контуженныг олыс. 1947 талт Ханты-Мансийск ўст олум партийный школат хаништахтас. Няхшамволь ос Сортыңъя павлыгт нәпак ловиньтан колт рўпитас. Ётыл Ханты-Мансийск ўст хонтыт сакватахтам маҳум пусмалтан колн патхатыглас, тот рўпитас. 1961 талт Саранпавылн ватлыс, тот 118 экспедицият рўпитас.

Петр Тимофеевич 1975 талт яңк нәтнә этпост Саранпавылт атимыг ёмтыс.

Л.К. ВИНГИЛЕВА
потраге мәнъши ләтңыг
С.РОМБАНДЕЕВАН
толмашлавесыг

ПОБЕДА ХОТАЛ КАСТЫЛ



Рўтанум урыл потыр хансэгум

Война порат касың щёмьяныл хум
Хотпат хонтлаңкве тотвёсыт. Мән
сав рўтанув та мән кётвёсыт, савыңпалэ
юв ат ёхтысыт. Ам амки рўт махманум
урыл хансэгум, хумус номёгум, хумус
омам ос атам потырталсыг.

Мёңквья павыл
Моловув сав ёнк-
варп пормасыт ёлэгыт.
Мань тагыл мән ваглюв,
хотьют маныр вёрыс.
Мулы сáмт пасан вáтат
сысың улас ўнылы, тый
аким Пётр Никитич
Алгадьев тав вáрум
уласэ. Аким таланэ мощ-
щаг кос ёлсыт, тувыл
мáштырлаңкве сака
хáсыс. Тав 1924 тáлт са-
мын патыс, хонтлаңкве
миннэ элы-пáлт вóраим,
хул алыщлым ёлыс.

Та урыл пёс газетат
ловиньтаңкве рови. Ты
нэпак Татьяна Андре-
евна Головина, Хулюм-
сўнт павылт нэврамыт
ханищтан нэ, Хальўс
архив-колт хонтыстэ.
Газета 1942 тáлт вáт
саграпнал ётпос 11
хотáлёт тáратавес. Потыр
рущ лáтныл тох намаим
ёлыс: «Что дали охот-
ники Нясимвольского
совета для фронта». Ос
тох ёвылтахты: «Кáрка-
мыг рўпитан сав вóраян

хумыт Красный Армиян
минасыт. Хонтлаңкв
миннэ махум пёнтсыл
маньлат пыгыт, нэ хот-
пат ос яныгпáла ойкат
вóраянкве патсыт. Тán
пуссын акв номт ёныщ-
гыт – тақыщ, кáркамыг
рўпитаңкв ос Красный
Армиян нётуңкв. Вагтáл
патнэ тáл вóраян махум
Няхщамвóль павылт
рўпитэгыт.

Тán сав вóруй алыщ-
ласыт, нилыт квар-
тал магсыл хансум план
130% сáвит сáвнуевг
варсыт. Элыт миннэ
Хулюмсунтский колхозт
рўпитан махум план-
нэпаканыл 133% сáви-
тыг вáрсаныл. Тán ёвыл
местат висыт.

Та халт 16 тáл яныт
Пётр Никитич Алгадьев
щар кáркамыг рўпитас.
Тав акв сóтыра 460
солкóви сáвит вóруй
сов колхозн мис.

Вóраян хум Никита
Алгадьев такви планэ
132% сáвитыг вáрыстэ.




Нэ хотпат ёс сака
ёмашакв рўпитасыт.
Прасковья Алгадьева
хўрум ётпос магсыл хан-
сум планэ 362% сáви-
тыг вáрыстэ. Евдокия
(Анисья) Алгадьева
вóруй сов 377 солкóви
сáвит колхозн мис.
Тав планэ 250 солкóви
ёлыс. Хулюмсунтский
колхоз махум ты тáл
хул алыщлан артель
установ-нэпак щирыл
рўпитаңкве патсыт. Тán
пуссын акван-юрщ-
хатым, кáркамыг рўпи-
тэгыт, план ёмшакв то-
варттэгыт.

Пётр аким 18 тáлэ
вóртур ётпос 18 хотáлёт
хонтлаңкве та тотвес.
Инженерно-сапёрный

отделения сапёрыг
ёлыс. 1943 тáлт пищма
ёхталас, эрттам порсла-
вес, улпыл, пусмалтаң-
кве тотыглáлвес. Ёвлёт
Калининский, тувыл
Белорусский фронтыт
хонтлас.

1944 тáлт щáщёкв
Мария Васильевна
Алгадьева китыт
похоронка-нэпакыл
кётвес. Тот хансым
ёлыс: «Пётр Никитич
Алгадьев ос 1944 тáлт
лўпта ётпос 12 хотáлёт
пилтáл хонтлым хотáлэ
щалтыс, Литовский
ССР Вильнюс ўст ёл-
щёпитавес». Щáщёк-
вам ты юи-пáлт яныг
пыге хоса юв ўрыстэ.
Хорамың лáглың нёхс
совыл хансаң кёнтыл



йонтыстэ. Ты кѣнт мѣн ты мус ўргалым ѓньщилўв. Похоронка-нѣпаке 1979 тѣл мус ѓньщастэ.

Анѣ махум ищхй-пын утыт яныг хѣнтит хѣнтлум рўтаныл урыл сѣвсыр нѣпакт кинсѣгыт. Михаил ѓпщим ѓгитѣ Александра Алгадѣева ты похоронка-нѣпак тот хѣнтыстэ. Аквта мѣт ос мѣт нѣпак ѓлыс, аким П. Н. Алкадѣев «За отвагу» маглын тагатам пѣсыл майвес. Тот хансым ѓлы: «Красноармеец Алкадѣев пилтѣл хѣнтлас. Лучеса ос Суходровка ѓг ўлтта унсах вѣрунѣке ѓрыс. Тав молях ос сака кѣркамыг вѣр сѣгрыс. Алкадѣев нупыл сунсым мѣт сѣлтатыт кѣркамыг ос пилтѣл рўпитаѣке патсыт». Нѣпак 1944 тѣлт лўпта ѓтпос 28 хѣталт хасвес. Ты юи-пѣлт ѓйттур ѓтпос 4 хѣталт приказ-нѣпак вѣрвес, П.Н. Алкадѣев маглын тагатам пѣсыл майвес.

Тувыл ѓщум Тамара Алгадѣева ищхйпын утыт хурит хѣнтыс, тот Вильнюс ўст ѓл-щѣпитым мѣтѣ пѣслым ѓлы. Кит сѣтыра 906 ѓлумхѣлас тот ѓл-щѣпитавѣсыт. Тѣн пуссын Белорусский фронтыт хѣнтласыт ос Вильнюс ўс вуянтым порславѣсыт, наманыл пуссын яныг ѓхвтас-пѣрт тармыл

хасвѣсыт, аким наме тот ѓс ѓлы.

Ам ты тѣл мѣньполь ѓтпост Александр хумим ѓт Вильнюс ўсн ѓлуѣке тахсумѣн. Тувыл тох ѓмтыс, мѣ янытыл мир хаштѣл ѓгмыл ѓмтуѣке патсыт, тымѣгсыл ат минасамѣн.

Аким Александр Васильевич Алгадѣев 1941 тѣлт хѣнтлаѣке тотвес. Тав 1942 тѣлт ѓтимыг ѓмтыс, Ленинградский ѓбласть Тихвин ўст ѓл-щѣпитавес. Мѣлты тѣл Победа хѣтал ѓлы-пѣлт увщиягум Анна Назаренко (Алгадѣева) ос Татьяна Куприянова (Алгадѣева) та ўсн ѓлсѣг. Мѣнки ѓлнѣ пѣвлувныл мѣ-лѣмт тав ѓл-щѣпитым мѣтѣн тотсѣг. Хѣнтым нѣпак щирыл Алгадѣев хансым ѓлыс. Тихвин ўст ѓхвтас-пѣрт тармыл ѓпарищ наме ѓс тащирыл хасвес.

Щащѣквѣм мѣнь ѓпщитѣ Александр Васильевич Анемгуров ѓс хѣнтлас. Хоты мѣт порславес, хѣт ѓл-щѣпитавес, ты мус аты вѣглўв. Тав китыт ѓпщитѣ Роман Васильевич Анемгуров 1942 тѣлтвойнанминас. 1943 тѣлт яныг таквс ѓтпос 11 хѣталѣт порслувес. Александр Григорьевич Анемгуров, щащѣквѣм апге, война ѓвылтахтам порат 18 тѣлѣ туп тѣвлыс. Ос тѣра



Самбиндалов К.В.

хѣнтлаѣке вуйвес. 1944 тѣлт мѣньполь ѓтпос 28 хѣталт порсыс. Литва мѣт Вильнюсский район Зотос пѣвылт ѓл-щѣпитавес.

Омам Галина Константиновна Алгадѣева акиянѣ ѓс хѣнтласыт. Тѣн пуссын Яныгпѣвылныл ѓлсыт. Степан Васильевич Самбиндалов 1910 тѣлт самын патыс. ѓвлѣт финский войнан тотвес. Юв аты ѓхталас, ѓлаль хѣнтлаѣке кѣтвес. Тав 1943 тѣлт Сталинград ўс вуянтым порславес. Тав ѓл-щѣпитым мѣтѣ хѣт ѓлы, мѣн анѣ тыг мус аты вѣглўв. Мѣнь апге Кирилл Васильевич Самбиндалов 1920 тѣлт самын патыс. Ленинградский фронтыт хѣнтлас. «За оборону Ленинграда» маглын тагатам пѣс ѓньщас. Война юи-пѣлт Няхщамвѣль пѣвылт ѓлыс, ѓкватѣ Александра Васильевна Самбиндалова ѓт сѣт нѣврам янмалтасѣг. Тав 1968 тѣлт ѓтимыг ѓмтыс. Семѣн Васильевич Самбиндалов 1913 тѣлт самын патыс. Война ѓлы-

пѣлт сѣлы ўрим Нѣрт яласас. Хѣнтлаѣке 1943 тѣлт тотвес. Сталинград ўс вуянтас, 1944 тѣлт юв ѓхтыс. Дарѣя ѓкватѣ ѓт хѣт нѣврам ѓщсѣг. Семѣн Васильевич 1966 тѣлт ѓтимыг ѓмтыс.

Рўтанув урыл сѣв потрыт Татьяна Андреевна Головина хѣнтыс. Тав Хулумсўнт пѣвыл школат ханищтахтын нѣврамыт ѓт ты сака ѓрнѣ рўпата вѣри, хѣнтлам хѣтпат ос та порат кѣркамыг рўпитан махум урыл сѣвсыр пѣс нѣпакыт потрыт кинсы. Тымѣгсыл мѣн тавѣн яныг пўмашипа лѣтыѣ лѣвѣв. Анѣ хѣнтлам рўтанув урыл сѣвнув вѣгўв.

Ам мѣньщи мир Победа хѣталыл янытлы-янум, сѣв ѓмас, сымыѣ лѣтѣыл лѣвиянум. Рўт махманын наманыл ул ѓрувлѣн, тѣн пуссын Победа хѣтал кастыл хѣнтласыт, мѣтаныт ос юн яныг рўпата вѣрсыт.

Елена АДИНА
кѣтум потре
нѣпакн Людмила
АЛГАДѣЕВА хансыстѣ



Вильнюс ўс



Кульпасныл кётым потрыт

Хальүс район Кульпас павыл
Хшколат Евдокия Ивановна
Кугина няврамыт маныщи латңыл
ханищтыяне. Победа хөтал кастыл тав
ханищтан агирицияне ос пыгрищанэ
танки рүт махманыл урыл маныщи
латңыл потрыт хассыт. Няврамыт
хансум хүрум потыр элалы ловиньтэн.

Щар мак сөтың хөтал

Касың элумхөлас такви сөтың хөтал оньши, намхөталэт, хунь сав мүйлупсал мүйлуптаве, хунь ляпа рүтанэ ёхтэгыт. Хоса үрхатнэ лёңх, хунь хот-таль минуңкве щёпи-тахтэтын. Касың хөтпа тамле хөтал ёмашакв номитэ.

Ман анёкванув, ща-щёкванув, ащойканув, опанув тамле хөтал ос оньщёгыт – тьи яңк нятнэ этпос онтоловит щислат Победа хөтал. Нила хоса тал ман мавт яныг тарвитың, пилыщ-маң хөнт олыс. Та войнат ман мирув нөх-патыс.

Тьи яныг хөтал тан пуссын сака үрсаныл. Махмыт пуссын савсыр матт олсыт, яныг ўсытт, мань павлытт манос вёрт татем ёмас ляххал хўлым та щэгтсыт. Ат вайхатнэ хөтпат кон акван-сынгтахтым лёщсыт. Тан таимаг-сыл лёщсыт, төват тан атянаныл, каңканыл, пыганыл яныг хөнтныл юв ат ёхтысыт.

Ам омам опатэ, **Абрам Васильевич Гындыбин** лов щислат яныгпөль этпос 1924 талт Кульпас пөхат Кимкъя павылт самын патыс. Тав 1942 талт хөнтлаңкве вуйвес. Вёртур этпосныл ват саграпнал этпос мус 1942 талт тав яныг хөнт лёңхе өвыл Украинский фронтыт олыс.

Абрам Васильевич
Курский Дугат,
Сталинград ўст 288
стрелковый полкыт
ос 105 миномётный
батальоныт рядовой
стрелок-автоматчикыг
хөнтлас. 1942 талт ват
саграпнал этпосныл
өвыл щисланыл ос 1943
тал яныгпөль этпос
мус яныг хөнт лёңхе
«Катюша» намп 109
стрелковый полкыт
олыс.

Ман ат ваглүв, манрыг тамле машина «Катюша» лававе. Ты вәрмалы урыл савсыр пүмаш потыр олы. Лававе, эрттам, акв маньлат пыг БМ-13 машинат эруптан агитэ наме хансыс – Катюша. Тувыл пуссын БМ -13 «Катюшаг» лавуңкве та патсаныл. Мот потыр щирыл яныг хөнт олум порат «Катюша» эрыг пуссын эргысыт, тувыл машина ты намыл та пинвес.

Яныг опам вильтыт нялыл хойвес ос щёпри-тэныл кон-нэгыс. Тав пўльницат хоса хуяс. Ты юи-палт юв та кётвес. Абрам Васильевич 1943 талт ват нупыл хўрмит щислат юв ёхтыс ос тара «Жданов» намп колхозт рўпитанкве патыс.

Тувыл рыбучастокт хўл алыщлан хөтпаг олыс, ётыл сторожиг рўпитас. Хўл алыщлам поратэт Марья Ивановна Сайнахова нэ ёт хөнт-хатас. Тэн акван-ми-насыг, нёлолов няврам



янмалтасыг. Овлэт кол-таглэн ёт тэн Потрасўй павылт олсыг, 1967 талт Кульпас павылн вант-ласыг.

Омам опатэ маныщи щёмьят яныгмас, савсыр рўпата кәркамыг вәрыс, пилорамат рўпитас, плашкоутыт яласас, охсар сов щёпитас. Тэлы такви найив атыглас, вөрн ялантас. Туи пум вәрысыт, мис-лув оцсыт. Омам лавыглас, опатэ сака ёмас хөтпаг олыс, лөль латың шар нэмхуньт ат лавыглас. Ань тав апганэ Кульпас павылт, тувыл Когалым ўст ос Набережные Челны ўст олэгыт.

Яныг опам хөнтламе магсыл маглын тагатан тамле пөсытыл майвес: «Орден Отечественной войны II степени», «За Победу над Германией» - хўрум пөс, «Вооруженных сил СССР» хўрум пөс. Тав сав янытлан ос мот ёмас нэпак оньшас.

Ты халт «Ударник Коммунистического труда» намыл майлуves.

Абрам Васильевич 1991 талт ват нупыл нёлолов хөталэт Кульпас павылт хотталь щалтыс. Ам анёквам, Лидия Ефимовна Гындыбина (Кугина), ляпа рүтанэ хөнтлаңкве ос тотвёсыт, ащойкатэ Тирикурый ос сасгаге юв ат ёхтысыт, тот хөт та порслувёсыт.

Ты пилыщмаң вәр-малы урыл ман ат ёрувлэв. Төнт сав махум юв ат ёхтысыт. Хальүс район 1 сөтыра 900 элумхөлас войнат порслувёсыт, сав махум война юи-палт нюлмияныл магыс хотталь щалтсыт.

Ман павлуvt хөнт-луңкве ялум хөтпатныл ань нэмхотыют воссыг атим.

Елена ос Абрам
ГЫНДЫБИНЫГ
хансум потрэн

ПОБЕДА ХӨТАЛ КАСТЫЛ

Яныг օпам хөнтлас

Ам օтам օпатэ наме Александр Иванович Кузнецов օлыс. Тав 1941 тәлт Ягрим павылныл хөнтлаңкве тотвес. Война օлы-пәлт вөр үргалан хотпаг рүпитас.

Белорусский фронтыг артиллеристыг хөнтлас. Хөнтлам мāt хұрум щёс сакватәлвес, хұрум щёс пұльницат пусмалтавес. Юи-օвыл щёс пұльницат сав օтпос хуяс. Ты юи-пәлт օгмың-мосың хөтпаг օмтыс.

Хөнтламе мāгыс ос

сав тәл кәркамыг рүпита-таме мāгыс «Орден Славы III степени», «За отвагу» мāглын тагатап пօсыл майлуves.

Война юи-пәлт Кульпас павылт рыбучасткат хұл алышлас. Пенсиян хунь патхатас, нйврам үргалан колт օти рүпитас. Яныг օпам Кульпас павылт օл-щөпитавес.

Ты потыр 3 классыг ханищтахтын пыгрищ Юрий ГАВРИЛЬЧЕНКО хансыс



Кāсың пувим хұл ловиньтавес

Победа мāгсыл та тәр-витуң порат мāхманув сав кәркамыг рүпита-сыт. Сāлы үрнэ мāхум, вօраян, хұл алышлан хөтпат օс сав օр пинсыт.

Ам потрум Анастасия Васильевна Отшамова урыл мины. Тав 1930 тәлт яныгпօль օтпос 15 хөталәт Сорум օган курт мāt самын патыс. Омаге-օтыге Василий Яковлевич ос Екатерина Алексеевна Новыховыг та порат сāлы үрим Вогулка я вātат օлсыг.

Анастасия мāньтāгыл сāлы үруңкве нөтыс. Война хунь օвылтахтас, хұл алышлым рүпитаңкве патыс. Та пора урыл Анастасия Васильевна тох потыртас: «Павлын хумит пуссын хөнтлаңкве тотвёсыт, тәрвитуң рүпата нэ хөтпат вāрсыт ос нйврамыт тāнанылн нөтсыт. Мāн āлпыл нօх-квālэв, пилэв, хұлпын хоям хұланув ул вос сакёгыт. Ос тāра пир-майтан колн тотсанұв. Та порат кāсың хұл ловиньтавес. Кұщай хум акваг лāвыглас: «Кāсың пувим хұл мāнавн войнат нօх-патуңкве нөтыс». Тәтāл порат мāн туп хұл тәсұв, мօт тәнут воссыг āтим օлыс. Хұл совныл маснут,

хұрыгсовыт йөнтсұв, хұл лувныл колас вāрсұв.

Та юи-пәлт почтальоныг рүпитасум, пищмат, газетат, мօт пормасыт сāлыл акв павылныл мօт павылн тотыгласум. Ам сāлыңколт яныгмасум, сāлы пօхыт օлуңкве ханьшувласум. Почтат рүпитаңкве āнумн օс сака мұстыс. Тувыл вօр сāгрим рүпитасум. 1961 тәлт Тәк павылн օлуңкве вāнтласум. Сав тәл колхозт савсыр рүпата вāрсум, пенсиян патхатнэм օлы-пәлт почтат колкан ловтым рүпитасум».

Анастасия Васильевна օйкатәнтыл Алексей Филиппович Отшамов օт онтолов нйврам օщсыг. Аким Алексей Филиппович хөнтлаңкве օс ялыс. Война юи-пәлт Анастасия Васильевна օт акван-минасыг. Тән ань сас āтимыг օмтсыг. Агяннән ос пыганән пуссын օмас хөтпаг янмалтасанән, тāн воспитателиг, мā-вит үргалан, хұл алышлан, нйврам ханищтан хөтпаг ань рүпитәгыт.

Марина ТАБУН
көтум потре Людмила
ТЕТКИНА мāньщи
лātңыл хансытэ

Мāн таве номилұв

Никонор Николаевич Артеев – тыи анёквам тав āтытэ. Тав 1909 тәлт самын патыс. 1941 тәлт тав войнан вүйвес ос 1946 тәлт тав хөнтлан мāныл юв ущ օхтыс.

Яныг ащойкам «Орден Красной звезды» ос «За Победу над Германией» мөталит օнышас. Тав 362 Краснознамённый орден Суворова и Кутузова стрелковый

дивизият хөнтлас.

Война юи-пәлт Кульпас павылт «Жданов» нампa колхозт кұщаиг рүпитас. Никонор Николаевич 1960 тәлт вāt сāграпнал օтпос 13 хөталт хотталы щалтыс. Кульпас павылт օл-щөпитавес.

Ты потыр Алексей Желтых, 3 классыг ханищтахтын пыгрищ, хансыс



ПОБЕДА ХОТАЛ КАСТЫЛ



Ам օпам ос ащօйкам хօнтлуңкве ялсыг

Ты тал яныг хօнт оигпам пәсыл 75 тал төвлыс, ныврамыт танти օпаныл, ащօйканыл урыл мәнавн пицма тетэгыт, тән хօнтлуманыл урыл хансэгыт. Ханты-Мансийск үст օлнә аги Светлана Колова такви օпатә ос ащօйкатә урыл хансыс.

Паща օлән! Түя щар мак яныг ялпың-хօталув янытлылу, мән странав нօх-патум хօтал. Ам янытлахтым лавегум: «Ащօйкам ос օпам хօнтлуңкве тотыглавеси, тән мав вуянтым хօнтлысыг».

Опам Колов Алексей Фёдорович 1922 талт самын патыс ос 1993 талт атимыг емтыс. Тав сержантыг օлыс, яныг-пօль этпос 1944 талт хօнтлуңкве тотвес ос ват сәграпнал этпос 1946 талт уц юв ехтыс. Война օвылтахтам талт тав армиян օвләт ат вуйвес, Покровское павләт тәпкант рупитас. Хօнтлын мат 4 запасной танковый полкыт 52 танковый бригадат, 41 танковый полкыт Т34 писалил пәтлуптан хумыт халт кұцаиг օлыс.

Пәс нәпакыт тох хансым օлы:

«Колов такви экипаж-мәхманә эт Лучи павыл тал котиль этпос 15 хօталт, Виринбийск павыл 16 хօталт, Петраков үс 18 хօталт 1945 талт вуянтаманыл порат писалил емщакв пәтлуптасыт, тонт 5 яныг пушка, 4 бронетранспортёр сакватасыт ос фашистыт титсәттем салтатаныл, офицараныл алсыт».

Яныг хօнт оигпам юи-пәлт хум такви Покровское павлән ехтыс ос тот павланыл

хот-сакватым օлыс, нәматыр рупата ат хօнтыс, Алексей Федорович лүимән минас. Тыт катерыл яласым рупитас. Нoryт я хосыт нә-тылтасыт. Ётыл тарвигы рупата вәруңкве ат вәрмыс, павылт рупитанкве хультыс.

Ам օпам хօнтлуме порат такыщ сакватәлвес, терлөмтыт ләглән тагапасыт ос ләглә алаты хот-яктувес. Ётыл Ханты-Мансийск үст операциял вәрыгла-вес, ләглә пусмалтавес,

туп нюлмиянә хуль-сыт. Хօнтлым мат сакватым порат акв нәл-лөмт сымән хөям, тох та тер-лөмтә ёт та օлыс. Опам I ос II степень орден, тувыл Германия вуянтаме мәгыс металь օныщас.

Ащօйкам Павел Михайлович Нежданов 1922 талт самын патыс ос 1983 талт атимыг емтыс. Тав Ханты-Мансийск үсныл 1941 талт օйттур этпос 19 хօталт хօнтлуңкве тот-вес ос тәлы 1946 талт ювле уц ехтыс. Ащօйкам лейтенантыг օлыс. Тав 438 гвардейский минометный дивизионт, 313 гвардейский минометный полкыт командирыг օлыс. Фашистыг ёт хօнтлуме порат

нәматарыл ат пилыс, Родина тә такыщ вуян-тастә.

Павел Михайлович урыл тох ты хансым օлы: «Кельберг үс ляпат газовый завод օлыс, немцыт илттыг кваләпанкве щәпитатасыт. Нежданов ляпа мат сунсыглым та торыг лүляхօлыс, кәсаластә, фашистыт акв мат атхатмыт, такви мәхманән молях лавыс, тән тувле пәтлуптанкве патсыт. Немцыт хот-рохтысыт, тонт сав фашистыт щама аласыт ос газовый завод сымтәл-мәйтгәл утытн ат лик-мыс.

Ащօйкам 17 сәвсыр металь օныщас: Красная Звезда хұрум орден, II степень Отечественный Война орден, Сталинград вуянтаме мәгыс металь, Кенигсберг виманыл мәгыс, Варшаваныл фашистыт хот-нәвлуманыл мәгыс ос за Победу над Германией металит. Орёл, Рогачев, Сталинград, Бобруйск, Волковыск, Белосток үсыт вуянтаме мәгыс ос Дерут я ұлта унсуманыл мәгыс янытлавес.

Ам амти օпамтыл сака янытлахтәгум, тән сака ёр ос пилтәл хумыг օлсыг, мән матәв вуян-тастән!

Хօнтлам мәхум мән акваг номуңкве паты-янув, тәнаныл номим ма мус хұтахләв!

Света КОЛОВА,
Ханты-Мансийск
үст օлнә аги, потре
Галина КОНДИНА
мәньши ләтһыл
толмашластә



ПОБЕДА ХОТАЛ КАСТЫЛ



Хонтлам махманув вос номиянуv

Яныг хонт урыл сав эрыг
вaрыглавес, махум ань тыхотал
мус хансэгыт. Ты эргыт халт акв
эрыг олы – «Память».

Тав хонт урыл ати кос, ос та урыл – мaн ань та
пиышмаң хонтыт патум махманув номиянуv
ман ати. Эрыг вaрум хотпа ань олнэ махум сома
китыглыанэ: «Нaн та нак, тот хонтлам махманув
номиянын? Тaнти мaнaныл хумус вуянтасаныл,
хумус саваласыт, номиянын?»

Ты эрыг Вологда уст олнэ хум Олег Скрэтч
тав хансытэ, 2014 тaлт. Тувыл «Город» наппа
творческий объединение колт рупитан хотпат эт
кина-охса вaрыс.

Эрыг эргункве намың-суиң артистыт вoвсыт
– Дмитрий Песков, Оскар Кучера, Сергей Бадюк
ос Андрей Мерзликин. Кинан акв ветеран oйка
пoслысаныл, наме Алексей Александрович
Перминов. Тав Великий Отечественный войнан
вуйлуves, 1943 тaлт Курский битват хонтлыс. Oйка
Вологда уст oлыс, 2018 тaлт атимыг емтыс.

«Память» эрыг ам маңыщи лaтңыг толмашлас-
лум, нaн ань элаль тaве ловиньтэлын.



Журит А.А. Перминов пoслым oлы, 2014 тaл

Ты нак номелын

Хунь ты нак урыл номуңкв
ат патэв,
Таксар махум емас тэланыл
та ёрувлaвe,
Сыманув пoлям витын
нарыгтыянvв,
Лaгыл ёлы-пал пaңк халн
тэлыглэв.

Хунь ёрувлэв, манах лылы
патыс,
Лото ёныг холт акв осытыл
лoль ляххал тотвес,
Пилтaл тaн сорманыл лaлыт
суссыт,
Тонт нирoвыл холт
cагумтаңквe вёрмавёв.

Хунь та тaлыт номтанувт
пoхан-урмыгтыянvв,
Хумус cалтатыт кёлпаныл
мaнн пoccыт,
Юи-oвыл щёс лылаялым,
патсыт,
Тонт тивранув тaтлаг
ёмтапёгыт.

Хунь оманув самвитаныл
ёрувлэв,

Хумус нэ хотпат махманыл
юв ўрсаныл,
Атнэ няныломтаныл ахвтас
хольт сурсыт,
Хонтылуv – cымтaл, мaйттaл
та ёмтмуv.

Припев:

*Сэиң лёх хосыт, нёр я хосыт –
тaнaныл нoмён!
Совыт ос раквыт, тaлыт ос
тувыт миннэ cыс – тaнaныл
нoмён!*

Хунь маңылат хотпа шўлытым
aтанэ ёрувлэв,
Хумус тав писалъ нялыт халн
тэлыглым хайтыс,
Такви мaтэ вуянтым тaкыщ
люлис,

Тыи ат те номёв, тoрум нупыл
манарув пoйкщёв?

Хунь патум махум наманыл
ос хурияныл ёрувлэв,
Вoвтa номтаныл ахвтасың
кол холт олсыт,
Ўлщпуңкыл кёрквaлгыт
маныгтасыт,
Тонт манаратёв янытлаңкв
патёв?

Хунь та нак шар ат
номылматaлылуv,
Хумус тoрумныл ёлаль
нялыт тaратавёсыт,
Кол-капаит бoмбатын пулиг-
сакватавёсыт,
Тонт сорум коньпал мaныр
ёрув oлы?

Хунь номтанувт та махманув
ёрувлыянvв,
Хотьют выгыр этвитың алпил
мaтeныл сыныгтасаныл,
Хумус мa нюлмиянэ ворисл
пусмысыт,
Тонт аман элумхoласыг
хультэв, нoмуңквe патавёв? ...

Припев:

*Сэиң лёх хосыт, нёр я хосыт –
тaнaныл нoмён!
Совыт ос раквыт, тaлыт ос
тувыт миннэ cыс – тaнaныл
нoмён!*

Эрыг маңыщи
лaтңыг Светлана
РОМБАНДЕЕВАН
толмашлавес

ПОБЕДА ХОТАЛ КАСТЫЛ



Сұқыръя павыл хумыт номавет



Яныг хонтын касың павылныл сав хотпа тотвес. Сұқыръяныл нелсат нупыл хұрум хум хотпа хонтын ман вуйвёсыт. Тән халанылт 46 хум тот порслувес, 27 хотпа юв ёхталасыт.

Патум махум халт намың-суиң хум олы – Константин Алексеевич Панков. Сав махум Ленинград үс вуянтым порслувёсыт, тот ёлщёпитым олэгыт. Юв ёхталам хотпат халт

сав тал туп Григорий Николаевич Сайнахов ос Алексей Михайлович Тургачев олсыг.

Ты хонтлам махум наманыл Галина Николаевна Ларионова тарапаттысанэ. Тав ёре хосыт

павланылт ахвтасың парт тармыл наманыл тув та хасвёсыт.

Ты памятник павланылт 2010 талт лұпта ётпост тұштүвес. Та тал пасныл касың Победа хотал янытлан порат тот сав мир акван-атхатыглары. Тән опанылащойканыл, ляпа рұтаныл кастын мағыс тув ёхталэгыт.

Ат тал ювле хультум порат Сұқыръя махум акв пұмыщ тэла номылматалсыт. 1941-1945 талт Щекурьинский колхозт махум хумус рұпитасыт, та урыл Галина Николаевна такви акв ётпостем потыр хансыс. Та порат ты колхоз Карл Маркса намыл пиным олыс.

Потре асламе юипалт, тав павлың махманэ ёт клуб-колт акван-атхатыгласыт ос ты спектакль мирн

суссылтан мағыс щёпихатасыт.

Касың хотпа ос нйврам тот ёнгункв касащас. Хум хотпат военный форма массыт. Нёквет ос хотют маньши маснутыл масхатым олыс, хотют саран супыл. Павлың махманыл ты ёнгиланыл сака мұстыс.

Ань ты накт акван-атхатыглаңкв ат рёви. Ос Сұқыръя павылт олнэ махум танти салтатаныл нэмхуньт ат ёрувляныл. Тасавит хотпа акв павылныл хонтын ман та тотымат. Тән пуссын пилтал хонтысыт, мав тақыщ вуянтасаныл. Хонтыт патум ос юв ёхталам Сұқыръя павыл хумыт наманыл пуссын памятникыт хансым олэгыт.

Галина ЛАРИОНОВА
потре маньши
лётныл **Валентина**
ХОЗУМОВА хансыстэ



2019 тал

Лұимә сәрипос

(Северная заря)
№9 (1219), 14.05.2020
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Врио директора, гл. редактор –
Кондина Г.Р.
Телефон (3467) 33-22-72

Заместитель гл. редактора –
Кондина Г.Р.
Телефон (3467) 33-22-72

Ответственный секретарь –
Узель В.В.
Телефон (3467) 33-23-09

Адрес редакции и издателя:
628011, г. Ханты-Мансийск,
ул. Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул. Маяковского, д. 14.

Индексы **04399, 54399**

Тираж **1710** экз.
Заказ **1591**
Цена свободная

Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.

Свидетельство
о регистрации
ПИ №ТУ 72-00795
от 23 января 2013 г.